

## Morning Regional Dogri News Bulletin, 25<sup>th</sup> May 2024

मार्निंग डोगरी न्यूज़ बुलेटिन, समे. 09-20 Hrs

<><><><><><>

### Headlines

1. मुख्य दे 6 राज्ये ते दऊं केन्द्र शासत प्रदेशे दे 58 संसदी हल्के च अज्ज लोकसभा चुनाएं दे 6में गेड़ तैहत वोट पोआए जा'रदे न।
2. जम्मू कश्मीर च लोकसभा चुनां दे खीरले गेड़ तैहत अज्ज अनंतनाग-राजौरी पार्लिमानी सीट लेई मतदान होआ करदा ऐ।
3. बन्ने आले जिले-पुंछ ते राजौरी च पैहले दऊं घेंटे दरान मतदान च तेजी दिक्खने गी लब्धी ऐ।
4. सुप्रीम कोर्ट नै पोलिंग बूथ दे स्हाबै मतदान दी प्रतिशत दा आंकड़ा अपलोड करने लेई गीारती चुनां आयोग गी निर्देश जारी करने थमां नां करी दित्ती ऐ।
5. भारत नै दक्खन कोरिया च तीरंदाजी दे विश्व कपच रण-2 च महिलाएं दे कंपाउंड मकाबले च सुन्ने दा तगमा जित्तेआ ऐ।

<><><><><><>

### 6<sup>th</sup> Phase

लोकसभा चुनाएं दे 6में गेड़ लेई अज्ज वोट पाने दा कम्म शुरू होई गेदा ऐ। इस गेड़ च 58 संसदीय हल्के च वोट पाए जा'रदे न। इस गेड़ च बिहार दी 8, हरियाणा दी सब्बै 10, झारखंड दी 4, दिल्ली दी सब्बै 7, ओडिशा दी 6, उत्तर प्रदेश दी 14, पच्छिम बंगाल दी 8 ते जम्मू कश्मीर दी इक सीट पर मतदान होआ'रदा ऐ। मतदान बडलै 7 बजे शुरू होई गेआ हा। बीजेपी दे बड्डे नेता धमेन्द्र प्रधान, मेनका गांधी, मनोहर लाल, संबित पात्रा, बांसुरी स्वराज ते मनोज तिवारी ते कांग्रेस नेता दीपेन्द्र सिंह हुड्डा, कुमारी शैलजा, राज बब्बर ते कनैया कुमार सने प्रमुख नेताएं दे सियासी भविक्ख दा फैसला होग। समाजवादी पार्टी दे नेता धमेन्द्र यादव ते पीडीपी प्रमुख महबूबा मुफ्ती दी बी सियासी भविक्ख दा फैसला अज्ज ईवीएम च बंद होई जाग। इस गेड़ च इक लक्ख 14 जहार मतदान केन्द्रें पर 11 करोड़ 13 लक्ख थमां मते मतदाता अपने वोट पाने दे अधिकार दा इस्तेमाल करगंन। चुनां आयोग नै दिल्ली, गुरुग्राम ते फरीदाबाद जनेह शैहरी इलाके दे वोटरे गी अपने वोट पाने दे अधिकार दा इस्तेमाल करने दा चेची गुजारिश कीती ऐ।

<><><><><><>

### Anantnag-Rajouri

अनंतनाग-राजौरी संसदीय सीट लेई अज्ज वोट पाने दा कम्म बडलै 7 बजे थमां शुरू होई गेदा ऐ। इस नशिस्तै लेई 18 लक्ख 30 जहार शा मते मतदाता चुनां मैदान च खड़ोते दे कुल 20 मेदवारें दे सियासी भविक्ख दा फैसला अज्ज संजा तगर ईवीएम च बंद करी देंगन। बन्ने आले जिले पुंछ ते राजौरी च खरा मता मतदान होने दी मेद ऐ। भारती चुनां आयोग नैपैहले इस सीट पर 7 मई गी वोट पोआने दा ऐलान कीते दा हा पर माड़े मौसमी हालात गी दिक्खदे होई इसी अगड़ा पाइयै 25 मई करी दित्ता गेआ। अनंतनाग राजौरी संसदी हल्के च कुल 5 जिले-कुलगाम, अनंतनाग, पुंछ, शोपियां (जैनापोरा) ते राजौरी ओंदे न, जिंदे कुल 18 असेंबली हल्के न। इंदे चा 7 असेंबली हल्के राजौरी, नौशहरा, बुद्धल, थन्नामंडी, सुरनकोट, पुंछ ते मेढर जम्मू संभाग हेठ पौंदे न। बन्ने आले जिले पुंछ ते राजौरी च बडलै थमां गै बक्ख-बक्ख मतदान केन्द्रें दे बाहर मतदाताएं दियां लम्भियां-लम्भियां रींगां दिक्खियां जा'रदियां न। अनंतनाग-राजौरी हल्के च कुल 2 जहार 338 मतदान केन्द्र खडेरे गेदे न ते 9 जहार शा मते चुनावी कर्मिएं गी ड्यूटी लेई तैनात कीता गेदा ऐ। मतदान गी बवस्था

आले ढंगै सिर करोआने लेई सुरक्षा दे बी निग्गर प्रबंध कीते गेदे न। इस सीट लेई मुख्य मकाबला पीडीपी दिएं प्रमुख महबूबा मुफ्ती, नैशनल कांग्रेस दे मियां अल्ताफ ते अपनी पार्टी दे जफर इकबाल मनहास हुंदे बश्कार मन्नेआ जा'रदा ऐ।

<><><><><><>

### Poonch-Haveli 1<sup>st</sup> Voter(byte)

पुंछ जिले च खरी मती गिनतरी च लोक वोट पाने लेई बक्ख-बक्ख मतदान केन्द्रें पर पुजजा करदे न। आकाशवाणी दे पुंछ संवाददाता अनुभव मिसरी दी रिपोर्ट मूजब मतदान दा कम्म ठीक बडलै 7 बजे शुरू होई गेआ हा ते पैहली बारी वोट पान जा'रदे नोजवानें च मतदान गी लेइयै मता जोश दिक्खेआ जा'रदा ऐ। मकामी प्रशासन नै मतदान गी बवस्था ते शांतिपूर्ण ढंगै नै करोआने लेई सब्बै लोड़चदे प्रबंध जकीनी बनाए दे न। हाई स्कूल परानी पुंछ दे मतदान केन्द्र नंबर 121 पर पैहला वोट पाने आले सिद्धांत खजूरिया नां दे मतदाता नै आकाशवाणी संवाददाता कन्ने चेचे तौर पर गल्लबात कीती। उनें गलाया.....बाईट

<><><><><><>

### Rajouri Voting(byte)

बन्ने आले जिले राजौरी च पैहले दऊं घैंटे दरान खरा मता मतदान होने दी जानकारी थ्होआ करदी ऐ। राजौरी च कुल 3 लक्ख 89 ज्हार 721 मतदाता न, जिंदे च 2 लक्ख 2 ज्हार 809 मर्द, 1 लक्ख 86 ज्हार 905 महिला ते 7 ट्रांसजेंडर मतदाता न। राजौरी च बनाए गेदे कुल 542 मतदान केन्द्रें चा 278एं गी संवेदनशील घोषत कीता गेदा ऐ। राजौरी दे जरानू इलाके दे बसनीक 102 ब'रें दे मीर चंद होरें मतदान गी लेइयै आकाशवाणी कन्ने अपने बचार सांझे कीते।

<><><><><><>

### Migrants Voters

तकरीबन 27 ज्हार विस्थापत कश्मीरी पंडत मतदाता अनंतनाग7राजौरी पार्लिमानी सीट लेई वोट पाने लेई तैआर न जेह्दे पर अज्ज 25 मई गी मतदान होआ'रदा ऐ। इस सीट पर 18 विधानसभा इलाके च सब्बने शा मते मतदाता न ते मतदाताएं दी कुल गिनतरी 18 लक्ख 30 ज्हार 294 ऐ। जिंदे चा 9 लक्ख 30 ज्हार 379 मर्द, 8 लक्ख 99 ज्हार 888 महिलां ते 27 ट्रांसजेंडर शामिल न। विस्थापत मतदाताएं दी बद्ध ते मळतव आली गिनतरी गी ध्यानै च रखदे होई उंदी सहूलत लेई जम्मू च 21 मतदान केन्द्र ते आक्सीलरी केन्द्रें गी खडेरेंआ गेदा ऐ।

<><><><><><>

### PM-Appeal

प्रधानमंत्री नरेन्द्र मोदी होरें लोकसभा चुनाएं दे 6में गेड़ तैह्त अज्ज वोट पाने आले सब्बने लोकें गी गुजारश कीती ऐ जे ओह् बधी-चढ़ियै वोट पाने दे अपने हक्कै दा इस्तेमाल करन। सोशल मीडिया दी इक पोस्ट च श्री मोदी होरें आखेआ ऐ जे हर इक वोट दा अपन महत्व ऐ ते लोकतंत्र दी मजबूती लेई सब्बने आस्सेआ मतदान कीता जाना अत्त जरूरी होंदा ऐ। प्रधानमंत्री होरें महिलाएं ते युवाएं गी खास तौरा उप्पर मतदान दी गुजारश कीती ऐ।

<><><><><><>

## Supreme Court-ECI

सर्वोच्च न्यायलय नै अज्ज लोकसभा चुनां दे दरान अपनी वेबसाइट उप्पर मतदान केन्द्र-वार मतदान प्रतिशत अपलोड करने दी याचिका उप्पर चुनां आयोग गी निर्देश जारी करने लेई इंकार करी दित्ता ऐ। न्यायलय नै चुनावी प्रक्रिया दे बिच्च दखल अंदाजी आला रवैया अपनाने दा समर्थन नेई कीता ऐ। न्यायधीश दीपांकर दत्ता ते सतीश चन्द्र शर्मा दी पीठ नै याचिका पर आखेआ ऐ जे सुनवाई लोकसभा चुनां दे परैत कीती जाग।

<><><><><><>

## Security Samba

सुरक्षाबलें कल सांबा जिले च अंतर्राष्ट्री बन्ने कन्नै लगदे केई ग्राएं च तपाशी अभियान चलाए। बेई लालाचक्क अपने अगेत्रे इलाकें च संदिग्ध नकलो हरकत दियां रिपोर्टा थोने परैत सुरक्षाबलें इस कारवाई गी अंजाम दित्ता। आकाशवाणी दे जम्मू संवाददाता मूजब एहतियाती हीले दे तौर पर रंभे गेदे इस अभियान दरान सुरक्षाबलें निगरानी लेई ड्रोन दी मदाद बी लेती। सुरक्षाबलें मंगुचक्क, सादेचक्क, रीगल ते चचवाल ग्राएं अंतर्राष्ट्री बन्ने कन्नै लगदे इलाकें दे घर-घर जाइयै बी जांच कीती।

<><><><><><>

## Bollywood J&K

बॉलीवुड दे मशहूर अभिनेता अजय देवगन होरें कश्मीर च अपनी औने आली फिल्म सिंघम-3 दी शूटिंग दरान जम्मू कश्मीर दी सरकार दा पूरा सैहयोग देने लेई दिलै थमां आभार जताया ऐ। इक वीडियो सनेह राएं अधिकारिएं दा घन्नबाद कीता जे ओह फिल्म दी शूटिंग च कश्मीर दी खूबसूरती गी दर्शाने च सफल रेह न। कश्मीर च सिंघम-3 दी शूटिंग राएं इस खेत्तर दे सैलसफा गी बढ़ावा थोग ते इस फिल्म च कश्मीर गी वैश्विक मंच उप्पर प्रदर्शित करने दी दिशा च इक सकारात्मक गैह दे तौरा पर दिक्खेआ जा करदा ऐ।

<><><><><><>

## Farmers

जैविक खेती गी अपनाने ते बढ़ावा देने दे मकसद कन्नै रामबन दे राई-बाई मैहकमे आस्सेआ जिले दे ततारसू ग्रां च करसानें लेई इक ध्याडे दे सिखलाई कार्यक्रम दा सरिस्ता कीता गेआ। आकाशवाणी दे रामबन संवाददाता मूजब इस कार्यक्रम दा मकसद करसानें गी जैविक खेती दिएं बक्ख-बक्ख तकनीकें बारे जानकार बनाना हा। कार्यक्रम दरान 50 करसानें दे नां दर्ज कीते गे ते उनेंगी जैविक खेती लेई लोड़चदे संसाधन मुफ्त उपलब्ध करोआए गे।

<><><><><><>

## Cannes Award

“Sunflowers were the first one to know” फिल्म, फिल्म ते टैलीवीजन इंस्टीच्यूट ऑफ इंडिया दे विद्यार्थी चिदानंद एस.नायक ते उंदी टीम गी 77में कैनर्स फिल्म उत्सव च “ La Cined ” अवार्ड हासल होआ ऐ। विजेता दी अधिकारिक घोषणा कल महोत्सव च कीती गेई। फिल्म दा निर्देशन चिदानंद एस.नायक होरें कीता ऐ, शूट सूरज ठाकुर होरें, अडिटिंग मनोज वी. होरें ते साउंड अभिशोक कदम होरें कीता ऐ। सूचना ते प्रसारण मंत्रालय नै आखेआ ऐ जे भारतीय सिनेमा लेई एह इक ऐतिहासिक पल ऐ एफटीआईआई नै पिछले किश बरें च कैनर्स च खरा प्रदर्शन कीता ऐ। 77में कैनर्स फिल्म उत्सव च भारत थमां बक्ख-बक्ख श्रेणिएं च मती सारी प्रविश्टियां आइयां हिआं। एफटीआईआई दे मते सारे साबका छात्र जिआं पायल कपाडिया, माइसम अली, संतोष सिवन, चिदानंद एस. नायक ते उंदी टीम गी इस बरे कैनर्स फिल्म उत्सव च मान्यता हासल होई।



## IPL

आईपीएल क्रिकेट च सनराईजर्स हैदराबाद नै कल चेन्नई दे एम.ए.चिंदबरम स्टेडियम च खेड्डे गेदे दुए क्वालीफायर मैच च राजस्थान रॉयल्स गी 36 रंजें कन्नै हराई दित्ता। जित्त लेई 176 रंजें दा पिच्छा करदे होई राजस्थान रॉयल्स नै तैहशुदा 20 ओवरें च कुल 139 रंज गै बनाई सकी ते ओह्दे 7 खडारी आउट होए दे हे। एह्दे थमां पैहले सनराईजर्स हैदराबाद नै 20 ओवरें च 9 विकटें दे नुकसान पर 175 रंज बनाए। हैनरिच क्लासन नै 34 गेंदें च 50 ते ध्रुव जुरेल नै 35 गेंदें च नाबाद 56 रंजें दी पारी लेई खेड्डी। सनराईजर्स हैदराबाद लेई शाहबाज अहमद नै त्रै विकटां, जिसलै के ट्रेंट बोल्ट ते आवेश खान नै राजस्थान रॉयल्स लेई 3-3 विकटां हासल कीतियां। हुन सनराईजर्स हैदराबाद तारें चेन्नै दे एम.ए. चिंदबरम स्टेडियम च कोलकाता नाईट राईडर्स दा सामना करोग। एह्दे थमां पैहले कोलकाता नाईट राईडर्स नै सनराईजर्स हैदराबाद गी पैहले क्वालीफायर मैच च हराया हा।



## Archery Gold

दक्खन कोरिया दे सेचे ओन च तीरंदाजी विश्व कप दे स्टेज 2 च कंपाउंड महिला टीम इवेंट च भारत नै सुन्ने दा तगमा हासल कीता ऐ। ज्योथि सुरेखा वेनम, पुरनीत कौर ते अदिति स्वामी दी त्रिगडी नै फाइनल मकाबले च तुर्की दे खलाफ स्ट्राइक करियै सुन्ने दा तगमा हासल कीता। विश्व नंबर 1 भारतीय कंपाउंड महिला टीम नै पैहले छोर थमां गे तुर्की दी हेजल बरुण, आमसे बेरा सुजर ते बेगम युवा उप्पर हावी होइयै सुन्ने दे तगमे उप्पर मोहल लाई दित्ती।

